

同治鄞縣志

第 二 冊 一

鄞縣志卷六十三

古蹟三

元

浙東道宣慰司都元帥府 元帥廉希哲因郡治重建正廳曰帥

正西室曰思無邪東室曰公生明經歷司治焉後堂曰敬簡

延祐志

卓瑛記浙東爲海右巨鎮一道七郡職此其統卽古之方伯連率自唐宋以來部使名稱不一唐置觀察使紹興年間立沿海制置司以鎮之所隸者溫台明越皇元混一寓內置浙東道宣慰使治於越遷於婺大德六年十月旨陞都元帥府凡軍翼成於東浙者咸隸焉樹旄秉鉞職高而權重七年秋移治古明州明三垂際海扶桑在其東甌粵在其南且控扼日本諸蕃厥惟喉襟之地聖天子臨軒冊命常選用重臣非御史耳目之官則宰執股肱之寄重其地則重其人也視事之所軍民具瞻率仍總府舊解歷年多棟橈屋腐將撤其舊而新之屬至大二年正月郡城火延燎更樓由廳及序俱爲瓦礫因陋就簡尙惟草創是循四年十月帝命中奉大夫廉希哲爲宣慰使都元帥公家世將相材也至之日旗幟精明官府整肅慨然銳意有所興作迺率僚佐謂之曰東浙爲今北門牙幢茸蘂植焉萬馬貔貅立焉非壯嚴則無以崇體勢而肅儀型也僉曰然命吏拖繹舊櫝

官爲給料起蓋迺手畫口授盈尺而盡其制徵材鳩工百堵交
作十二月正奉大夫宣慰使都元帥鄭祐中奉大夫同知元帥
馬合謀符節相望而至爰始爰謀爰契我龜同寅和叶是謂大
同由是梓人僇功坊者展力羣工具舉邦人咸輔其勞而不省
其爲役可謂使民以時矣計屋凡若干楹崇棟高閣華棖藻稅
翼以廊廡繚以垣墉聽事有廳扁曰帥正退食有堂扁曰敬簡
有幙有館吏事有舍大其門閭巍其牆仞非但朱甍翬飛碧瓦
鱗次其宏大靚深氣象雄特可超越曠昔十倍而玉帳森嚴之
居於是乎稱焉經始於至大四年二月越明年皇慶改元七月
榮祿大夫宣慰使都元帥阿塔脫因來鎮是邦用集厥成是年
訖功命郡文學掾卓玟記之愚竊謂公卿大夫出而爲天下用
宇宙閒事卽吾已分內事扶顛持危興墮補弊隨其職守皆足
以究勲業明自建大府以來毋慮數政坐閱十稔殆類築室於
道視不過郵傳是以不朽之功畱以俟今日若有數然乘可爲
之時持竟成之志一時肇新千古作鎮不其偉歟雖然明公皆
社稷臣也今之同心治是室異時同心治天下是或一道也謹
書以識皇慶元年
三月十八日記

餘軒

在元帥府側

剡源集

戴表元記鄆程士安佐浙東元帥府於明公退不忍棄其餘日
讀書以明理畦所居軒外餘地種蔬以給食而問軒名於余余
名之曰餘軒士安遂巡而笑曰吾之問子義止於是乎余爲詳
言士安之起居出處所以資於餘者以告之人之居世必有事

焉以勞其心思而役其筋骸古之君子自孩童以上冀除趨走絃歌舞蹈弓矢羽籥之類及諸賤事無不嫻熟故平居多勞而少疾一旦驅之臨煩處劇則亦無趨趨畏懦之色者餘於身也齊民之倫莫貴於士爲士而不識其事憤焉與凡民何異豈獨不異仕而糜之則反以爲賊不仕而儕之則反以爲蠹山林韋褐之徒足未嘗履官府而憂人之憂急人之急魁然負廊廟之望者餘於識也以醫藥者不習則殺人以沒泗者不習則殺身政之禍福危於醫險於泗而人之習之蓋鮮羣居豢養不知衣食之所自來況復餘事今以一人耳目之聰明坐於五流四民之上而指揮布置縱橫左右人人不失其所欲者餘於政也谷容澗湖容谷瀆容湖海容瀆閭閻隘夫扶背齧齒出橫逆以挾人至於大人長者之前如飄風然蓋有有道之士以容一世之人而未足觀其胸次休休焉若可以容天地萬物者餘於量也才支一時智周終身是能及其所知而止惟德無所止堯舜垂文章爲永世法禹之水功稷之農勞仲尼之儒道衣被長育且累千百年天之助之入之味之亦累千百年不絕者餘於德也士安生於齊魯諸生之宅里衣冠翰墨今爲許洛通才盛年方出遊大藩府於學何所不該於用何所不給鉛槧俎豆閒事不可不問而悉也抑此五餘者其毋忽忘乎哉士安唯唯因書以爲記

廉訪司分司 舊在錄事司西北隅州西門裏卽宋通判西廳至

大二年燬以鄆縣舊治爲之在東北隅開明橋之北

延祐

中爲廳

事曰澄清東西廡爲吏舍

至正志

案曰今爲城守營守備署城守教場并五營藥局俱舊縣

治址也

慶元府總管府 舊以宋府治爲之大德七年元帥府遷於慶元

迺移治四明驛卽宋通判廳故址也延祐五年同知張伯延重建

如帥府制

延祐志

劉基慶元路總管府題名記有元誕受天命奄宅四海地大人眾振古莫及皇帝惟生民之休戚繫在司牧乃命大臣嚴簡守令親承清問傳乘如官所於阿殷圖公由江陰監州選爲慶元路總管三年政成而課最朝廷采輿議進公監郡而以兩浙都轉運鹽使李公思敬代爲總管同寅協恭悉仍舊政會新修府治告完二公乃相謂曰茲郡爲浙東大府跨海爲治帥聞所臨視他郡爲最劇我輩以譴薄首膺重任大懼弗稱以幸上心今幸與民相安可不益思自勵以答天子之寵命乎惟題名古有其制非以爲夸也名之存實必隨之官政之臧否弗逃於民口閭巷之聲悲樂必形焉得其心而祝違之而訕一有所觸其發不可掩天下之情然也使爲政者昭其名於石必有指而祝者否則必有指而訕者祝以爲吾勉訕以爲吾戒勉則力之戒

則改之庶民觀之予日察之近足以爲吾規遠足以爲後人懲
且勸則是石也庸可廢乎其僚屬咸曰善且非獨二守然也吾
屬亦當如之於是自監郡以下至於提控
案牘莫不悉鑄其名俾來者又繼於後

推官廳 在府廳之西經歷司在府廳之東延祐志至正二年總管

王元恭於府廳後蓋軒屋一所扁曰至善經歷司後亦剏屋一所

白三友堂至正志至正八年燬於火十年重建成化志

胡世佐重建推官廳記慶元境域包山際海民俗糴雜郡府眾
務訟獄爲繁司聽鞠者當至劇時由旦達暮不得息府治西偏
別置廳事爲推審之所宏大足以庇風雨周密足以禦寒暑至
正八年夏五月市燎延及皆成虛寓遷無常湫隘喧襲咸謂非
宜議復未遑也是歲之冬濟南高君東平王君相繼來爲郡推
官既署事獲視遺址詢舊規制相與謀曰事有廢墜常也廢而
莫興墜而莫舉責不在人乎十年二君乃捐俸爲資度其址審
面勢量廣狹計崇卑凡材木鐵石瓦甃黝堊之必於用者無不
預備募工營構不踰月而成正南闢大門左右挾兩室分爲二
案曰祥刑曰儀法門之內有廳曰明恕正法廳之後有軒扁曰
靜思上有閣扁曰清遠治園於後植花竹累石爲臺結草亭其
上有以資游息扁曰閒樂不隘不囂於以聽辯訊鞠心甯意定鮮
有不得其情者信乎居宇爽塏亦勤政之一助也昔魯大夫叔
孫所居一日必葺史傳記之以彰其善今也二公存心能公待

物能恕泣事能勤聽決明允優於所職興公字於既燬盡復舊觀益加美焉已任勞勩推逸遺後人究其所以能然之故良由以世家承先德詩書道誼之宅素所熏習內融於心發而措諸事業充乎有本而無難也高君名克禮字敬臣故鎮江路總管亞忠公之世嫡王君名士然字繼善故大司徒翰林承旨魯國文肅公肯堂先生之季子家同閱閱世同簪組官同列職同事意氣相孚議論相符或推或挽故能職無不振事無不舉以成可書之績所謂同寅協恭而和衷者與今茲所記庸以啟來者使知作始之難嗣葺弗替或存永久非徒著興建之善而已也

案曰宋通判東廳元初爲四明驛後又移總管府於此明

改甯波府治至今仍之

司獄司

在元帥府橋之南卽宋司理院故址

延祐志

泰定間司獄

林龍澤築堂曰平恕燕室曰種德

清容居士集

世傳司獄司三字趙文

敏所書

聞志

袁桷新修司獄司記國朝肇置司獄司專以掌守囚禁職卑而勞猥爲其官常憤憤不得志浮湛坐曹日數歲月希善代謁吏部者每請託求免注繇是視爲傳舍狴犴之不修桎梏之不整所至皆是憲部審決亦有所不暇及簡漏相仍其勢然也永嘉

林君龍澤之來守是官也曰吾不可不自振考其成蹟則疑
姦重者上憲府輕者白郡守多有所變易罪以不冤囚民宜之
久之曰獄不可不繕營至大二年獄既燬支弊植仆僅存其制
於是除地撤瓦築堂三楹曰平恕堂後燕室曰種德左右翼軒
環以吏廡迺築高門迺闢園土養疾有堂奉神有祠繚以瓦垣
浚以甘井取足備具各中繩墨蓋先之以己俸而官若民迺悉
爲之助不旬月而告成噫亦難矣昔人言不卑小官於林君見
之州縣疑獄郡輒以委林君撫情以求其生量事以正其罪羣
吏抱案詣庭下無虛日是則林君之果能令官大也書曰典獄
非訖於威惟訖於富若是則甯有私諸者乎余直集賢林君時
爲掾史處事立具今觀其政績顯白足可稱道庸紀歲月是
役也興於某年某月成於某年某月泰定三年歲在丙寅記

錄事司

在西南隅迎鳳坊宋府院故址

延祐志

歸附後設置衙宇

至大二年燬延祐元年重建

至正志

萬戶府

在錄事司西北隅永濟坊卽宋僉判廳至大二年燬四

年重建

延祐志

係宋府倉并節推廳基

至正志

達魯花赤哈剌解德政記大元受天命撫有華夏威德光被
自朔而南歷數攸歸率土咸服則有忠致宣力之臣欽承德意
牧馭有方用能不冒海隅懋著嘉績乃歲乙亥皇帝命伯顏丞
相統率六師逾長江進駐京口遴選將帥經理海道今宣慰使

哈刺解元帥實膺分方之寄冬十月舟師由江入海所過州郡
軍民皆安堵如故明年冬以郡師南征直抵甌閩北至許浦咸
聽節制禁暴詰奸疆場賴以無事是年冬欽奉詔旨偕劉公統
師千艘遵海南伐所至戰勝攻取遂收番禺撫綏新附如初凱
還戊寅春公入覲凡將士之在行者悉爲奏請定功願宣命虎
符以次各有差授公昭武大將軍仍帥沿海兼牧慶元公於是
條上防海便宜自南恩至上海設水站三十有一戈船權卒在
在警邏從之成載攷績內則惠養百姓訓齊諸軍外則柔懷島
夷招降海寇城郭鎮靜波濤不驚征東造舟民不告病辛巳歲
公以都元帥隨逐征東行省至日本境颶風□舟楫不利涉險
道高麗渡遼水勁風積雪中草行露宿與士卒均勞苦歸於京
師勞資有加俾復本鎮至則鄞城燬燼軍伍無所依公急請省
府因城立營以安老幼市城置鋪以防奸宄治事有序閱武有
廳植柳成列軍容以壯藏冰俟暑病卒以蘇公所指畫具有條
理又四年朝制例革幕府更立沿海上萬戶府以公爲府達魯
花赤丙戌夏赴闕奏事始請慶元新附軍衣裝請給及防制海
寇禁緝鹽徒數端丁亥五月宣授浙東道宣慰使仍兼長萬戶
府公知民爲邦本兵爲民衛是以公之視民如骨肉兵之視公
如父兄交暢會□□□者移調軍屯水陸非便宜事聞因
言曰余有不合意安致其過聖明灼知宜加委任公忠於國家
無便文自營之私累如此公今以輔國上將軍旬宣一道總制
萬夫治久政成豐功盛烈將不書紀德先是萬戶吳江甯公元
帥與公連事今萬戶甯公繼承父職復同寅好蒞承愛民一以
公爲法且曰此府實公之始也可不具述余耄且病久不親筆

硯惟公有德於濱海之民甘棠之愛黍苗之澤凡癯老皆受其
賜曷敢固辭謹述所聞者而書之以紀其事明威將軍沿海上
萬戶甯居仁立石案此記不知何人所撰依至正志錄之下
篇則趙興撰文也然至正志但稱立石或別有故今亦依抄之
又記天以元克肖其德篤生聖皇誕受我有夏幅員既長悉主
悉臣兵刃不腥市肆不革蓋湯武之所難而漢唐晉宋之所未
有也惟元以乾之大而名其國以坤之至而紀其年君之元卽
天之元天以元運乎上而四時行品物亨六子之功也君以元
宅乎中而四海一塵霧清諸將相之力也由六子之功而知天
之功由將相之功而知君之功孰曰帝力何有於我昔唐元結
有曰帝王盛德大業必見於詩頌非老於文學其誰宜爲非老
於文學而爲之非惟不能抑亦不敢請得以頌諸將相之助可
乎初皇帝有事於江南曰汝伯顏汝阿朮躬行將相事而往征
定今沿海左副都元帥公稟成算植戰多襄漢淮郢聞知公名
甚稔既而副都元帥公稟成算植戰多襄漢淮郢聞知公名
所指遵海而南明年平福州又明年平廣南振旅朝京師皇帝
嘉之乃錫宣命虎符授今職仍領慶元路總管府達魯花赤蓋
公之在四明且五年三軍之選萬姓之繻兩得其心也興無狀
曩以定海統戎拜公於馬前凡公之征討治法善政嘉澤皆興
之目濡而心佩者不自揆倣昌黎頌丞相度元帥愬故事作爲
茲文以贊公之功雖然此明人之公言也非興之所得私也公
名哈刺解今爲臨汝縣人興乃再拜而獻曰大哉乾元至哉
坤元時行吏佐歲功成焉欽惟皇帝與天相似穆理元綱亦曰
臣子惟此陶唐有此冀方披圖闡珍孔厚版章皇咨視師汝丞

相度皇咨往伐汝元帥愬在唐爲愬在元爲公密受神算有定
武功竭來海東一意柔撫士不駭輿毗悉安堵圭觀龍闕光披
虎管何官可酬皇帝曰吁還之舊鎮卽我父母言人人同祝公
麋壽吾儕小人懷斯恩勤害曰報旃爰託斯文皇帝萬年天下
一統山甫有功吉甫作頌顯武將軍管管軍總
管管領定海水軍軍馬鎮守定海趙興立石

鎮撫所 在城隸萬戶府 至正志

兩浙都轉運鹽使司分司 在西北隅河利橋西係宋廂院及節

推廳基設置浙東鹽司例革改爲分司泰定元年燬三年郡侯郭

郁重建 至正志

袁桷兩浙轉運鹽使分司記國朝定煮海之賦倍於前代邦用
是資其選官委任爲不輕兩浙設總司於杭東西屬郡率置分
司以董督四明號爲東浙繁夥饑饉薦罹逋負益廣急之則疲
蕭愁歎黧色骨立見於毫稚故受其任者爲最難桷官翰林時
預議中書堂嘗白丞相乞減歲額丞相領其議於時大臣咸然
其說卒以戶部籍不能易是後憂國者乞減其直繼今善謀邦
計之士亦將有以待也泰定元年冬分司燬三年張侯伯威蒞
是邦以官楮若干委於郡郡守郭侯曰茲役不可緩必擇善於
營繕者是屬曰尹阮君申之縣庠之興尹能紹之曰尉周君一
夢尉解久湮尉能起之茲其以是屬僉謀曰取於山里胥是刪

鬻於市大賈以喜將視其材市於民堅完纘密是則不負於郭侯之教矣六月闢工九月告成聽事崇嚴夾舍拱揖門臺有敘百堵具列斧斤磬鼓不徹於垣周君則曰尉雖不才圉圉之設非我職矧轉運府設是則益以病盍去諸復以楮之餘者歸於司官常患不得其人急奉於公怨讟滋興況復因之以竊其利周君則不然人皆曰作之登登周君是承去其榜笞民完以熙若是則任其職者絕叫囂息追逮其賦甯有不登於天府昔之使者遺愛揭於堅珉矣後之來者登斯堂也藹然仁政將屢書不絕桷老矣尙當見之

泰定四年二月庚寅記

鹽倉一所 在西北隅永豐門裏至元十三年以後權貯稅糧延

祐七年復爲鹽倉

至正志

慶紹海運千戶所 在東北隅柴家橋西係宋南廳通判衙基歸

附後設立沿海翼鎮撫所皇慶二年軍馬移鎮婺州改立運糧千

戶所天歷二年重建

至正志

程端學記古封建之世天子賦粟於畿甸諸侯賦其所封勢定而力均地近而民逸自秦郡縣天下歷漢唐漕運於四方踰越江湖轉輸數千里官司之須兵民之儲饋餉非一水陸旣阻民力遂疲迨我皇元混平區宇始創海運取東南並海諸郡積粟

以實京畿置大府三吳外分六所設官專職買舟傭工悉酬公帑民不知勞神模遠畫度越前古明越當海道要衝舟航繁夥甲他郡而治所在明獨庫陋弗稱至圯壓不可支天歷元年夏武節將軍暗都刺公至官欲撤其舊而新之曰吾聞信而後勞其民吾之政未孚不可以有爲於是閱漕戶之貧弱逃徭弊虛籍者悉縱之異時傭直旁落徵集煩擾悉懲革之多授方略察夏竦勤怠示賞罰上下既洽乃捐己資二千緡以倡隸漕籍者咸感奮興繕富者効泉力者輸役始事於是年十有二月越明年三月訖工自堂至門列兩廡爲吏舍爲藏書舍聽令之廬庖庫之所各有其序又卽其東市民地爲馬廄以楹數之內外凡二十有八墜茨黝堊煥然稱美旣落成乃相與來請記其始末余謂古之君子作事識先務斯易爲功公欲興廢補弊能養其力俟其信而後動宜不擾而事集人見堂廡之翼翼抑知公之治其事之本乎公嘗提舉明之舶司公宇之新亦自公始前後成績左右輝映則知公之心久而弗渝是可書已公大都人其父哈迷公爲都府萬戶有聲公之爲政蓋亦有自云

慶元路市舶提舉司

在東北隅姚家巷係斷沒倉官房屋基地

重建公宇延祐七年例革至治二年七月復立

至正志

慶元路市舶庫

在錄事司東南隅靈橋門裏宋舊市舶務遇有

舶商到港官爲抽分其物皆貯於此不常設官

延祐志

有廩房二十

八間用天開瀛海藏珍府今日規模復鼎新貨脈流通來萬寶福
基綿遠慶千春字爲號土庫屋并前軒共六間至元元年勅蓋外
門樓三間以備關防

至正志

平準行用交鈔庫 在錄事司西北隅純孝坊宋節推廳故基元

至元十四年勅建

延祐志

永豐庫

在奉國樓裏平準庫之後

延祐志

係宋常平倉基至元十

三年蓋庫

至正志

案曰至正續志平準庫在西北隅清瀾橋東係宋僉判廳

至元十三年改立平準行用交鈔庫官降鈔本倒換昏鈔

成化志亦云平準宋僉判廳址永豐宋常平倉址

蒙古學

在西南隅倉橋側

延祐志

醫學

中統三年奉詔立學至元十八年勅建於東北隅貫橋之

南延祐二年二月重徙於東北隅魏家巷建官掌之

延祐

宋主簿

廳基至正

王應麟記醫之興也其於上古乎巫彭初作醫易為本於三皇
古三墳書倚相後無聞易以筮傳本草內經以醫傳天之牖民
至矣本草內經醫之原也易何與於醫坎離陰陽參同納甲發
其蘊養生者宗焉是以言醫必曰義農黃帝云成周醫有師江
左元嘉防建學唐州郡有學助教掌之宋崇觀間置學京師在
外附職侯類自古昔方技為王官之一守今朝廷崇獎蠲復悉
與儒等諸路設校立師教育之將躋斯民壽域德至渥也惟四
明學猶闕至元二十八年冬肅政廉訪副使陳公祥攬轡來臨
察民嚶呻尤以醫為重願講習無所喟然思作新興起之相攸
胥宇鳩工經始誌祀三皇禮儀肅堂宇門廡奐奕學成屬予以
記余聞之前修醫之為道推本五行六氣寒暑日星攷驗風土
山川其於人也骨節經絡揲荒腧穴內則藏府焦肓井谷精微
奧眇雖國工高手弗能究豈庸子俗夫可與知世不輕試而苟
得者鮮矣此學醫者人費可不謹乎是故醫不可無學岐伯之
師曰就貨季秦越人之師曰長桑君太倉公之師曰公孫光陽
慶蓋下學可以言傳上達必由心悟誦言未明於心讀古人之
糟魄斲輪猶議之矧壽天生死所繫乎然則學孰為要一言蔽
之曰仁程子謂醫書以痿痺為不仁最善名狀仁者又云切脈
可觀仁仁人心也天地生生之心人得之以為心仁則疾病
切身若保赤子萬物一體也不仁則善不勝利理汨於欲肝膽

楚越也陟降庭止前聖臨之在上以上存心以心合天如涪翁
之不求報宋清之不爲市龐安常之好施許叔微之陰功精義
入神將得不傳之妙於筌蹄之表惟貫道器德藝於一致者可
以語此其或專已臆決乃曰醫者意也是猶廢學古入官之訓
而曰何必讀書其害不止誤注本草而已殆非敦學師古之意
雖然余言髦矣儻以爲然願以爲學者之箴石是歲九月旦日
記

案曰至正志官醫提領所至元二十五年設立太醫院劄
正同副提領三員別無公宇就惠民藥局署事與延祐志
異

惠民藥局 在清瀾橋北元係宋宣詔亭屋三間并基地大德三
年撥置藥局至大二年燬天歷二年郡長阿里牙答思通議勸率
剏蓋樓房後廳各三間

至正志

陰陽教授司 至大二年十二月教授朱道甯齋印到路置立未
有公宇至順二年本路將西南隅倉橋東舊蒙古學廢屋三間披

一舍門樓一座開設教授司至元六年十二月教授宗道重修至正志

雜造局 在西北隅河利橋東係宋平糴倉基至元十三年改置

監造軍器至正志

織染局 在西北隅儒學西元係宋貢院基至元二十七年起蓋

局院泰定二年鄞縣尹阮申之提調改造土庫三間庫前軒屋三

間門樓三間廳屋三間并前軒廳後屋一間染房屋四間吏舍三

間絡絲堂一十四間機坊二十五間又有打線場屋四十一間土

祠一間在帥府後北首

至正志

卽雜造局廢址今爲白馬廟

廉惠山白馬廟

記

廣盈倉

在采蓮橋西宋威果三十營基蓋倉受納官民苗糧

至正

宋昌黎泉今稱八角井者在其地

四明談助